

**EL VIN FRIULARO
DE BAGNOLI
DITIRAMBO CON
IN FIN UN PICCOLO
VOCABOLARIO...**

Lodovico Pastò



E L
**VIN FRIULARO
DE BAGNOLI**

DITIRAMBO *Loda*

CON IN FIN

**UN PICCOLO VOCABOLARIO
DEI ZERGHİ VENEZIANI PIÙ SCURI**



VERONA 1821

TIPOGRAFIA DI PIETRO BISESTI

Editore

B^o 47.8.78^e

EL VIN FRIULARO

DITIRAMBO

FRA tante belle cosse
 Che Natura al mortal despensa, e dona,
 La prima, la magior, la più ecelente,
 Che non la cede a gnente,
 E che superba va per ogni logo,
 Perchè tuti la vol, tuti la brama,
 Onorada da tuti
 Qual celeste regalo soprafin,
 Che 'l cuor uman consola,
 Son certo, nè m'ingano, lu xe'l Vin.
 Sì, xe'l Vin quel dolce Netare,
 Che consola, che diletta,
 Quela zogia prediletta,
 Che brillante fa ogni cuor.
 Lu xe'l fonte d'ogni giubilo,
 Dela pase, e l'armonia,
 Ogni mal lu para via,
 Lu bandisse ogni timor.

Ma fra i Vini el più stimabile,
 El più bon, el più perfeto
 Xe sto caro Vin amabile,
 Sto Friularo benedeto (1).

Lu ga i gusti più stupendi,
 Tuti i odori i più sontuosi;
 No ga Vini el Benintendi (2)
 Del Friularo più preziosi.

Viva sempre la memoria
 Del famoso Giulio Cesare,
 Che à portà sto Vin in Udene
 Da paesi lontanissimi:
 Vin, che dopo molti secoli
 Trasportà da man benefica
 In sto nostro clima docile,
 In sta tera cussì fertile,
 Xe riussio, secondo mi,
 El più bon dei nostri di.

Su via donca alegramente:
 Tuti toga el goto in man,
 E bevemo fin doman
 De sto Vin cussì ecelente:
 Su via tuti alegramente.

Vegna in qua bozze , e bozzoni ,
 Ingistare , e botiglioni ,
 Canevete , e bariloti ,
 Zuche , fiaschi , squele , e goti ;
 Vegna pur sechi , e mastei ,
 Vegna bote , e caratei ,
 Damigiane , e madalene
 De Friularo tute piene ,
 E bevemo ,
 E trinchemo ,
 Tracanemo
 Sto bel sangue vegetabile ,
 Sto prezioso oro potabile .

Benedeto ,
 Che diletto ,
 Che piacer ; mo che gran gusto ,
 Che mi provo co te gusto !
 Co te gusto , caro ben ,
 D' alegrezza mi son pien ;
 Co te bevo mi me sento
 Tutto giubilo , e contento .

Guai se fusse una Dona . . . pofardia !
 Digo la verità , no conto frottole ,

Per bever de sto Vin mi ghe daria
 La scufia, el busto, el capotin, le cotole.

Bastonà,

Sculazzà,

Morsegà

Da una vecchia senza un dente,

Più rabiosa d'un serpente

Sia colù, che no'l ghe piase,

E la pase, e 'l dolce giubilo

Vaga lonzi dal so cuor.

Ma indorà,

Carezzà,

Cocolà

Da una cara gnognoletta

De sto amigo amiga streta

Sia colù, che sempre coto

Dala sera ala matina

Xe più duro del biscoto,

Xe più negro d'una rina,

Sia culù, che ghe ne ingiote

In t'un anno diese bote

Diese bote! xe anca poco,

O parlà cussì da aloco;

Mi le bevo in manco assâe!

Se vedessi che trincae!

E po, gnente, steme atenti,

Se volè restar contenti.

Za'l Friularo xe 'l più bon,

E lu solo porta el vanto;

Ma, benchè el me piase tanto,

In mancanza de sto Vin

No refudo el bon Corbin,

El Gropelo....

Ma bel belo,

Co no'l xe più che dolzon.

La roba dolce me fa mal de stomego,

La me sgionfa el bonigolo,

La me desmissia i flati,

Me par de aver in panza cento gati.

Son pezo dele femene,

Dele ragazze isteriche,

Son debole de stomego,

De fibra cussì languida,

Che un pero, un pomo, un persego,

Un figo, meza nespola

Me fa vegnir el spasemo.

El biro, le vertigini
 Col resto dei so diambèrni,
 Nè trovo altro remedio
 A tutti sti desordini,
 Che un fiasco de sto Vin benedetissimo,
 Che me remete in stato perfetissimo.
 Imparè, Donc miè care,
 A conoscer sto Liquor,
 E no siè più tanto avare
 A lodarlo, a farghe onor.
 Savè pur a quanti incomodi
 Zorno, e note andè sogete?
 Convulsion stramaledete,
 Cento specie de dolori,
 Svanimenti, latti cuori,
 Stomegane, e... che soi mi?
 De sti mali in sto local
 Ghè 'l remedio general.
 Ghè 'l remedio general,
 Ghè 'l cordial el più potente,
 Ghè la droga più valente,
 La più rara decozion.
 La più scielta confezion,

L' elisir el più divin...

Ale curte, ghè sto Vin.

Mo, no xelo un gusto mato

A svodar sti bozzoncini?

Via de quà sti gotesini,

Sti cosseti da Moscato:

Questa è roba da amalai;

Mi per mi no i toco mai,

Bevo sempre col bocal,

E mai mal, e mai dolori...

Sì, Signori, domandèlo,

Sempre belo come un fior

Me mantegno,

Me sostegno

Tuto spirito e vigor.

Cossa feu, che no bevè?

Sì, alafè, che vago in colera,

Via, sentilo co prezioso,

Co odoroso!

No ghe gnente, che ghe possa.

Anca el Cipro xe gustoso,

Ma el me fa la lengua grossa.

Bevè pur la Malvasia,

Mi la go per porcaria.

El xe assae megio del perfeto Scopulo,

Del Alicante, del Moscato fin,

Del Santo, del Braganze, d'ogni Vin.

Lo digo francamente *coram populo*:

Lu xe 'l Re de tuti i Vini,

Dei Liquori soprafini.

Via de qua Montepulciano,

Che se 'l beva tuto BACO,

El xe giusto el so macaco

Del Friularo, che ga un ano.

Che Canarie! che Tocai!

No i val gnanca i so pecai.

I me fa vegnir la rognà

Co i me nomina el Borgogna,

El Repo, el Palma, el Visnà,

El Sanremo, el Ratafià,

El Clarete, el Sanloran,

El Madera, el Frontignan,

El ... diavolo, che i strangola;

Butèli in te la zangola.

Andaria po zo dei bazari

Co i vien via co 'l so Vermute;

No ghè roba più antipatica;
 Più contraria ala salute.

Questo, questo xe quel balsemo,
 Che fortifica ogni stomego,
 Che fa far la dieta ai Medici,
 E falir le Spiciarie
 Co le so potachiarie...
 Ma tasè, che ghe un remedio;
 Che no posso disprezzarvelo:
 Questo xe 'l Cremor de tartaro;
 Mi per altro mai nol dopero:
 Ma sapiè, che Sior Domenego
 El me caro cuginadin
 M'à zurà *perdio bachissima*
 Che 'l xe un sal cavà dal Vin;

Oe, disè, quel Vin negron
 Xelo forsi del Stradon (3)?
 Sì, per dia! lè lu, lè lu;
 Sielo tanto ben vegnù:
 Xe cent'ani, che l'aspetto...
 Benedeto,
 Benedeto,
 Benedeto

Ti , è la mama , che t' à fato !

Mi son mato per sto Vin :

Coresin , vien qua , vien qua ...

Sì , caro , sì ,

Sì , fra ti , e mi

Feghimo un prindese

Stracordialissimo

Al' umanissima ,

Veneratissima

PARONA amabile ,

Illustre DONA (4) onor del Vostro Sesso ,

D' ogni grazia , e virtù gentil modelo ,

Ve sia propizio el Ciel , quel Ciel istesso ,

Che v' à donà quel cuor , che è tanto belo .

Quel Ciel , che a Vu soleta v' à concesso

El più caro , adorabile PUTELO ,

Quel Ciel ... ma , odio ! bisogneria dir tanto ,

Che mai se feniria : bevemo intanto .

Su via bevemolo ,

E a son de piferi ,

Trombete , e flauti ,

Tamburi , e timpani ,

Chitare , e cimbani ,

Lironi , e gnacare ,
 Su via onoremolo ,
 Imortalemolo ,
 E pieni de alerezza , e de morbin
 Cighemo tuti : viva sto bon Vin.

Viva , viva i mi PARONI ,
 Cavalieri splendidissimi ,
 E i PARENTI nobilissimi
 De sta Casa Ecelentissima :
 Ma i xe tanti , e tanto i merita ,
 Che fra Lori e i So gran meriti ,
 Se volesse nominarveli ,
 Resteria senza polmoni :
 Viva tuti i mi PARONI.

Viva , viva i Veneziani ,
 I mi cari Patrioti
 Grandi , e piccoli ,
 Vecchi , e zoveni ,
 Done , e Omeni ,
 Zentilomeni ,
 Galantomeni (5) ,
 Poveromeni ,
 Castelani , e Nicoloti (6) :

Viva tuti i Veneziani,
 I mì cari Patrioti.
 Via de qua malinconia,
 Bruta striga, va pur via:
 Se me casca adosso el mondo
 Mi, fradei, no me confondo;
 E co un goto de sto Vin,
 Sfido el diambarne e 'l destin.

Co sto Vin xe puro, e mero,
 Col xe fato a tempo giusto,
 El riese tanto fiero;
 Cussì negro, e pien de gusto,
 Che co'l bevo vago in estasi,
 E me sento tuto, tuto
 Bisegar, ma dapertuto
 Da quel so potente spirito,
 Che ale volte infin m' ispirito.

A Bagnoli, a Bagnoli, carissimi,
 Da sto Vin, che fa tanti miracoli,
 A Bagnoli, Poeti fredissimi,
 Se volè deventar tanti oracoli
 Quà ghè 'l Monte, ghè 'l Fonte, ghè Apolo:
 Ghè 'l Liquor, ghè le Muse, ghè l'Estro

Sto bon Vin, sto bon Vin lu xe 'l solo,
 Che ai bravazzi pol far da maestro.
 A Bagnoli, a Bagnoli v'aspeto
 Da sta fiamma, che infiamma ogni peto.
Vegna, vegna anca i più servidi,
 Vegna i Cigni canorissimi,
 I Poetoni, i primi Doti;
 Anca vu, Signor **CESAROTI**,
 Che a sta Fonte
 No sdegna de accostarse el **PINDEMONTÈ**.
 Me dirè mo a cossa far,
 Se savè cussì cantar?
 A tastar sto bon Liquor,
 A impenirve del so ardor,
 A compor una Bacheide
 Più sublime del' Eneide.
 Che se ancùo i ve crede **OMERO**
 Vivo, e vero,
 Co in sto Pindo vu sarè,
 E che indosso gavarè
 No chitare, no lironi,
 Ma do grossi, e bei fiasconi,
 Uno in panza, e l'altro al colo,

Sarè alora el vero APOLO.

Pare Bepo (7), pare sana ,

Via mainè quela Tartana ,

Voltè bordo , e vegnì a tera ,

Ma vegnì col vostro BACO ,

Che za credo stufo , e straco

De far guera in mezo al mar :

Via , vegnilo a restorar.

Varenta vu che al son de sto bocal

Ghe torna tuti i spiriti a capitolo ,

E dopo aver bevuo trequatro sessole

De sto Vinon che 'l cento pezzi imbalsema ,

El ghe reniova un prendese badial

Al vostro Abate COSTA inanzolao ,

Che anca da mi de cuor xe saludao . . .

Cossa xe? cortebandia !

No voi gnente , portè via . . .

Pandespagna ? diomelibera !

No dasseno , Paroncina ,

No magno gnanca late de galina .

Piutosto , se la vol , tratandose de ela ,

Mi buto via sto goto , e bevo con la squela .

La gran rabia , che mi provo

Co m'incontro in quei magnoni,
 Che destermine i caponi,
 Le dindiete, e i colombini,
 E che sorbe come un uovo
 I bodini,
 I tortioni, e le rosae,
 E po dopo ste magnaie,
 Aù mai visto i oseletti?
 Sti lovoni
 Sfoutradoni
 Beve il Vin cussì a sorseti.
 Vedeu mi? con un crostin
 Sugho un sechiò de sto Vin,
 De sta cara perla d'oro,
 De sto brodo da restoro.

Ghe darave dele scopole

A quei cani
 De vilani,
 Che ghe missia drentò l'acqua.
 Maledeto el Vin aquatico,
 E i sassini, che lo inaqua!
 Mi lo voggio sempre puro,
 Sempre grosso, sempre duro,

Che 'l se taglia col cortelo :
 Co 'l xe cussì mi svodo el caratelo.
 L' aqua, come savè, marcisse i pali,
 La porta mile dani ala salute,
 La fa, che chi la beve vegna zali,
 Che meta suso panza anca le pute.
 Va pur via,
 Zogia mia,
 Va dal caro Pizzanelli,
 Va pur da mio compare Boniceli.
 Se languisse,
 Se sbasisse dala sè,
 No ghe meto suso el naso :
 La go in odio, no ghè caso...
 Cosa? l' aque medicate!
 Siori sì, giusto a proposito
 Per lavarse le culate.
 Bevè pur l' acqua de Cila,
 De Nocèra, dela Vila,
 Dela Brandola, del Sasso,
 Se volè andar tuti a spasso,
 Bevè quella del Recoaro,
 Quela... quella... quella, un corno;

Me fe andar la testa a torno.

Bevè questo , questo , questo ,

Sto Friularo ,

Marmotoni !

Ve daria dei pizzegoni.

Su da bravi alegramente :

Tuti toga el goto in man ,

E bevemo fin doman

De sto Vin cussì ecelente :

Su via tuti alegramente.

Vaga pur l'amor al diavolo ,

Che son stufo de quel piavelo.

Oh! Donete mie carete ,

Madamine sveltoline ,

Zogie bele furbarele ,

Studiè pur quanto volè ,

Che mai più no me cuchè.

Ridè ,

Cantè ,

Balè ,

Pianxè ,

Sustè ,

Smanè :

Mai più , mai più , mai più no me cuchè.
 Andè pur dai vostri amanti
 Spasemanti, deliranti,
 Da quei cari polastroni
 Semplizoni, balordoni,
 Che per mi go bu'l bisogno...
 Co ghe penso me vergogno.
Memè vu, Madam? - uì,
Uì, mon ser, ze mur pur vu.
 Domandeme un poco a mi
 Sior cucheto de *Monsù*
 Viva, viva la mia Nina
 Frescolina,
 Tondolina.
 Viva, viva quel bochin
 Stretolin,
 Quel lavreto cremesin.
 Restaressi,
 Stupiressi,
 Se vedessi
 Quanto ben me vol custia.
 Ma chi xe sta cara fia?
 Che curiose! le gran femene!

Una bela Damigiana ;
 Che con mi fa sempre nana.

Che ricchezze !

Che grandezze !

Mo , che onori !

Via caveve cari Siori ,

Queste xe minchionerie :

No ghe dago un gotesin

De sto Vin

Per disdoto monarchie.

Quanto è bella la virtù !

Sì , n'è vero ? cari vu !

No ghè i pezo dei virtuosi :

I ga tuti i mali cronici ,

I xe tuti malinconici.

Panzarini ,

Del color dei canarini ;

E per causa de sti incomodi

I riesse fastidiosi ,

Despetosi ,

Taroconi ,

Litigoni

Tuti , tuti malsestoni

Vedeu mi, che mai no studio
 Che su 'l libro del bocal,
 Se son rosso come un gambaro,
 Se con tuti son genial?

Via da bravi tremo su:

Gran piaser, che da costù!
 Che comedie?
 Che tragedie?
 Che spettacoli?
 Che festini?
 Che casini?
 Che delizie?
 Che Brenta (8)? che Stra (9)?
 Che Padoa? che Pra (10)?..
 Alto quà.

Sò anca mi, che 'l xe magnifico,
 E che Padoa ga rason
 De tegnirise tanto in bon.
 Viva pur el gran talento,
 El bel GENIO,
 Che à dà moto a quel portentoso;
 Ma a parlarve schieto, e neto;
 Anca el Prà ga el so difeto.

Sì Signori ,
 Sì Signori ,
 Ghe voleva dei fiasconi ,
 Dei pistonì ,
 Dei piloni
 Tuti pieni de sto Vin ,
 Ben disposti fra le statue
 Come i vasi d'un zardin.
 Diese bote per canton
 Messe in forma de piramide ,
 Che formasse quattro guglie
 Superbissime ,
 Modernissime ;
 E in tel mezzo un gran tinazzo
 Del' altezza d'un palazzo ,
 Che portasse un stendardon ,
 Dove fusse scritto a pegola
 Con carateri da fabbrica :
VEGNA QUA CHI VOL VIN BON.
 Pofardia , che bel spettacolo !
 Sentiressi , che gran strepito ,
 Che farave un mar de popolo
 Co i so viva festosissimi !

Vederessi, che concorso!

Altrochè Fantini, e Corso!

Deme, deme quel fiascon:

El me par sempre più bon....

Oh, cospeto, l'ò svodà,

Vegna un altro, vegna in quà,

Vegna, vegna... maledeti!

Anca qua portè i fogieti?

I me fa vegnir i grizzoli,

No ghè i soldi più strupiai;

No i discore, che de guai,

Che de bombe, e de canoni,

Che de morti, e de ferì...-

Vostro dano, i mi minchioni,

No i me cuca minga mi.

Andè pur, andè ala guera,

Fève pur tagliar a pezzi,

Che mi salvo el centopezzi

A l'onor de sta bandiera.

Qua cervele,

Là buele,

Gambe, e brazzi va ale stele,

Canonae.

Schiopetae ,

Sabolae...

Mi no voi ste baronae.

Vedeu là quel caratelo?

Quelo xè 'l mio Colonelo.

Quele zuche , e quei bocaì ,

Quei xe tuti i mè Oficiai.

Quele tazze , e quei fiascheti ,

Le mie spade , e i mè moscheti ;

Nè per mi ghe xe botin

Più precioso de sto Vin.

Vardèlo ,

Nasèlo ,

Gustèlo ,

Provèlo d' Inverno , d' Istà ,

Bevèlo scaldà ,

Bevèlo giazza ,

Che sempre el trovarè una rarità.

Dolce amigo , vien qua dame un baso.

Mo che odor che rapisse ogni naso !

Che cimozza , che l'occhio consola !

Mo che godi col toca la gola !

Altrochè ciocolata , e cafè ,

Che sorbetti, ~~che~~ ponchi, che tè!
 No ghè gnente che sia più perfeto,
 Che me daga più gusto, e diletto.

Sto fiaschetto xe un intrigo;

Quela zuca, caro amigo...

Cossa feu?

Cossa diavolo me deu!

No v'oi dito el bariloto?...

Sì per crìspo che'l xe coto!

Tanto fa che vaga mi....

Pofardì? chi l'ha svodà?

Zito, zito, che ò falà;

El xe pien incoconà:

Panza mia, no te far star,

Che l'avemo da svodar.

Su per un,

Su per dò,

Su per tre,

Su su vè,

Bravo su!

Su, su, su...

Maledeta camisiola

Mola, mola,

Tagia, mola,
Che 'l me vien su per la gola.

Ah! Natura tropo stitica,
Perchè farne un solo stomego,
Un gargato cussì piccolo?
Mo perchè, perchè no farmene
Diese almanco, almanco quindese
Longhi e larghi come l'Adese,
Per trincar come un diluvio,
Tracagnar come un demonio,
Impenirme come un diavolo
De sto Vin saporitissimo,
Squisitissimo,
Arcistupendonazzissimo?

Ma cospeto, xe un gran caldo!
Uh! che caldo caldo, caldo!
Che siroco! vita mia,
Va pur là, va via, va via,
Beverò debò-bo-boto:
Dove xe 'l mio bariloto?
Saldi, saldi, casco, casco!...
Ve sugheu tuto quel fiasco?
Dè qua anca mi,

Che go una sè...

Butè, butè,

Svodè, impenì,

Cussì, cussì,

No più, no più,

Tolèlo vù...

De qua, de quà,

Per carità!

Che gho el palà

Seco brusà.

Voi trincar come un Todesco

De sto Vin stupendo, e fresco

Fin che vivo, e che gho fià,

Fin che in panza me ne stà.

Star Tais? far trinch, trinch.

Star home de Ghermaine?

Zu trinch, trinch vaine.

Se calantome star,

Zo trinch, trinch, trinch,

Melie custe ne provar.

Trinchèn, trinchèn de pone Friularach,

Cent mile pocal nit imbriach.

Ola ... o ...

Ola;... o ...

Ola , oe , no toco tera !

Vago , svolo , vago in aria ,

Presto , presto , sera , sera ,

Sera , sera quei balconi ,

Che no vaga cussì a svolo ,

Cussì solo ,

Fra le nuvole ,

Dove nasse i lampi , e i toni.

Sera , sera ...

Fra le nuvole ,

Lampi , e toni ...

Cussì solo ...

Sera , sera ...

Cussì a svolo ...

Quei balconi ...

Vegna Vin , per carità ,

Che la testa via me va.

Gnente , gnente ,

Alegramente :

Ogni mal me xe passà .

Benedeto sto bon Vin ,

Che consola el coresin !
Vreman trè bon !

*Alon , alon ,
 Alon , Monsù ,
 Che fet vu ,
 Che no bevè ,
 A la santè*

De tuti nu ?

Alon , bevon , trincon , finchè crepon.

Oimei ! cossa mai xe ?

Vardè , vardè , vardè

La sala s' à imbriagà !

La va de quà , e de là ! ...

Camina anca i taolini ,

I quadri , e i careghini ! ...

Agiuto , agiuto , agiuto ,

Vardè , camina tuto !

O dio , o dio , o dio ,

El mondo xe fenio !

Per mi digo de sì ...

Tegnì , tegnì , tegnì ,

Tegnìme cari vu ,

No posso star più sù ...

La tera tremola !
I travi bagola !
I veri scricola !
I muri screcola ,
Tuto precipita !
Porteme in caneva.

N O T E.

(1) Vino nero e squisitissimo , che si raccoglie in Bagnoli , Villa del Territorio Padovano, dove l'Eccellentiss. Famiglia VVIDMANN ha porzione delle sue rendite.

(2) Mercatante di Vini Forestieri in Venezia.

(3) Pezzo di Terreno dalla sua figura così nominato, che produce il Friularo dell'ultima perfezione.

(4) Sua Eccellenza ELISABETTA DUODO Contessa VVIDMANN.

(5) Voce che in Venezia nota il ceto medio.

(6) Il popolo di Venezia si divide in due corpi , quello di Castello cioè , e quello di San Niccolò.

(7) L'Illustriss. Signor GIUSEPPE Dottor MENEGAZZI amico dell'Autore , alludendo al suo Ditirambo il BACCO IN MARE.

(8) L'antico *Medoaco* , ma qui si parla del solo braccio che dona un amenissimo tragitto da Padova alle Venete Lagune.

(9) Paese lungo gli argini della Brenta corredato dalle superbe deliziosissime famose Ville PISANI.

(10) *El Pra dela Vale*. Vastissima piazza di Padova , luogo una volta fangoso ed impraticabile , disegnato poi , e ridotto magnificamente ameno.

VOCABOLARIO

DEI ZERGHİ VENEZIANI PIÙ OSCURI

A

Andar zo dei bazari *Mettersi grandemente
in collera.*

B

Badial

Squisito.

Bagolar

Traballare.

Baronae

Bricconate.

Biro

Specie di convulsione.

Bisegar

Ricercare.

Bonigolo

Ombelico.

Butar

Votare.

C

Canevete

*Custodie di legno per le
boccie.*

Caratelo

Botticella.

Careghini

Seggiolini.

Centopezzi	<i>Ventraja.</i>
Cimozza	<i>Spuma del Vino.</i>
Cocolar	<i>Migliorativo di acca- rezzare.</i>
Cotola	<i>Gonella.</i>
Cucar	<i>Cogliere, corbellare</i>
	D
Damigiane	<i>Gran fiaschi di vetro impagliati.</i>
Desmissiar	<i>Risvegliare.</i>
Dindiete	<i>Galinacci teneri.</i>
	F
Frotole	<i>Baje.</i>
	G
Gnognoleta	<i>Ragazza amabile.</i>
Grizzoli	<i>Brividi, il freddo della febbre.</i>
Godi	<i>Piacere vivo.</i>
	I
Incoconà	<i>Estremamente pieno.</i>
	L
Late de galina	<i>Per cosa squisitissima</i>

Macaco
Madalene
Malsestoni
Missiar
Molar

Pánzarini
Pare, sana

Pizzeghoni
Potachiarie

Rosae

Sbasir
Scopole

Screcolar
Scricular
Sessola

M

Specie di Scimia.
Boccalacci.
Sguajati.
Moscolare.
Sciorre.

P

Panciuti
Salute, amico; frase Ve-
neziana marinaresca.

Pizzicotti.
Sporcizie.

R

Piatti di latte coll'uova.

S

Morire.
Busse che si danno sul
capo con le mani.
Far cre, crecch.
Far cri, cricch.
Picciola Pala di legno
fatta per asciugare

*dall'acqua il fondo
delle barche, di cui i
Marinari si servono
per bere in mancanza
di tazza.*

Squele

Ciottole.

Stucar

Bere ingordamente.

Sustar

Dolersi

V

Varenta vu

Così Dio vi salvi.

Z

Zangola

Seggetta.

F I N E.